

Chabelito Chabelito Stòp di Yora

Muchanan awendia ta kanta (méskos ku nan mayornan) kon Chabelito a hasi kos di mala mucha. Ora e tabata hòrta for di pòtchi di suku, un raton a bula riba dje spant'é. P'esei Chabelito a buska su mama na yoramentu. Chabelito a atmití ku el a hasi malu. I maske e kantika no ta bisa, ora Chabelito a haña su mama, e lo a kont'é tambe tur loke a sosodé.

Tempran òf lat, nos tur ta hasi kos ku nos no mester hasi. Chabelito a hasi masha bon pa atmití su piká. Ma ta nèt riba e punto ei ku hopi biaha nos ta bolbe faya. Segun Skritura, ora bo hasi piká, bo tin ku konfesá e piká promé na Dios i despues na e persona(nan) ku bo a ofendé pa bo por drecha bo relashon ku Dios i hende.

Ma na lugá di hasi esei, hopi hende ta preferá kana rònt ku un konsenshi kulpabel. Nan sa ku nan a ofendé siertu hende, ma nan ta muchu orguyoso pa atmití esei na Dios, i sigur no na e persona konserní. I méskos ku Chabelito, nan ta tur intrankil.

Nos tin tur klase di ekskusa pa no atmití na e persona ofendé ku nos a hasi malu i pidi'é pa pordoná nos. Nota algun ekskusa ku talbes bo mes ta usa pa evitá di atmití e ofensa na e persona konserní.

“M'a disidí pa no hasié mas.” Esei ta un bon desishon! Ma e desishon ei no a resolvé e problema! Pakiko? Bo desishon ta afektá futuro so i no ta drecha pasado. Si bo sa ku mi a gañábo un biaha (so), anto mi ta disidí pa no gaña mas, mi por papia bèrdat ku bo añanan largu ma **tòg lo bo kòrda ku mi ta un gañadó.** Ketu bai lo bo duda si mi ta papia bèrdat e biaha aki! Ma si mi ta konfesá, esei ta hasi dos kos: **e ta rektifiká e pasado i ta restorá bo konfiansa pa ku mi pa futuro!**

“E tin mes tantu falta—òf mas tantu falta—ku mi.” Esaki ta un ekskusa favorito. Hopi biaha e frase aki por ta bèrdat. Ma si e tin 50% di e falta i abo tin 50%, den bista di Dios, bo ta 100% responsabel pa bo parti di e piká. Asta si e ta 99% kulpabel i abo solamente 1%, tòg bo ta **100% responsabel—i 100% kulpabel dilanti Dios—pa bo porsentahe di piká** i bo ta responsabel pa konfesá bo piká na Dios i e persona!

“E no sa mes di e kos...Pakiko bisa nan?” E argumento ta “Slaapende honden niet wakker maken.” Ma Beibel no ta papia di kacho ku ta drumi! Dios sa di bo piká, i bo piká ta perhudiká bo relashon kun'E! *“Ma boso inikidatnan a kousa separashon entre boso i boso Dios; i boso pikánan a hasi ku Su kara a keda skondí pa boso, asina ku E no ta tende”* (Isaias 59:2). Bo por hasi orashon kuantu ku bo ke, ma Dios ta bisa ku E no ta skucha tanten bo no ta trata ku e piká.

“Tabata un kos asina chikitu.” Si ta un kos asina chikitu, pakiko **bo** ta kòrd'é ainda? Si e ta asina grandi ku bo ta keda kòrd'é—e ta basta grandi pa konfes'é!

“E kos a sosodé tantu pasá.” E implikashon ta, nan a lubid'é; pakiko resusitá algu ku ta morto kaba? Ma en realidat, e asunto no ta morto! Si mi hòrta algu di bo un biaha so i bo ta haña sa, nunca mas lo bo konfiámi. Si e asunto ta morto, pakiko bo no a lubid'é ainda i pakiko Dios ta keda tres'é na bo memoria? Ma ora mi ta konfes'é na Dios i na bo, e ora ei si e kuenta ta kaba.

Proverbionan 28:13 ta bisa *“Esun ku skonde su pikánan lo no prosperá, ma esun ku konfesá i laga nan lo haña misericòrdia.”* Dor di nenga atmití bo pikánan, bo ta afektá bo trankilidat mental i (segun médikonan) por kousa tur klase di problema sikosomátiko. Bo por evitá tantísimo problema dor di umiyá bo mes i atmití bo piká. Siguiendo ehèmpel di Chabelito, bo tambe lo por stòp di yora.